



State Mufti's Office
Prime Minister's Office
Brunei Darussalam

Bolehkah Memberhentikan Sembahyang Bersendirian Untuk Menyertai Sembahyang Berjema'ah?

*(Dengan nama Allah, Segala puji bagi Allah, Selawat dan salam ke atas
Rasulullah Shallallahu 'alaihi wasallam, keluarga, sahabat dan para pengikut Baginda)*

Mengerjakan sembahyang secara berjema'ah adalah afdhal daripada mengerjakannya bersendirian. Ini adalah sebagaimana yang disebutkan dalam sebuah hadits bahawa kelebihan dua puluh tujuh kali ganda darjatnya daripada sembahyang secara bersendirian. Rasulullah *Shallallahu 'alaihi wasallam* bersabda:

()

Maksudnya: *“Sembahyang berjema'ah itu lebih afdhal daripada sembahyang bersendirian dengan dua puluh tujuh darjat.”*

(Hadis riwayat al-Bukhari)

Persoalan yang ingin ditimbulkan ialah mengenai orang yang sedang bersembahyang bersendirian, kemudian semasa dia bersembahyang itu ada kumpulan lain datang dan mendirikan sembahyang secara berjema'ah. Adakah dibolehkan orang tersebut memberhentikan sembahyang yang dilakukannya secara bersendirian itu untuk menyertai sembahyang berjema'ah bagi mendapatkan kelebihan sembahyang berjema'ah itu.

Hukum Memberhentikan Sembahyang

Pada dasarnya memberhentikan sembahyang fardhu sebelum ia sempurna dikerjakan adalah ditegah dan hukumnya haram. Ini berdasarkan firman Allah *Subhanahu wa Ta'ala*:

وَلَا تُبْطِلُوا أَعْمَالَكُمْ

(۳۳ :)

Tafsirnya: “*Dan janganlah kamu batalkan amal-amal kamu.*”

(Surah Muhammad: 33)

Akan tetapi jika dilakukan atas sebab-sebab tertentu yang dibenarkan oleh syara`, maka hukumnya adalah harus.

Adapun memberhentikan sembahyang sunat pula hukumnya tidaklah diharamkan sekalipun ia dilakukan bukan kerana keuzuran. Walau bagaimanapun menyempurnakan sembahyang sunat tersebut sehingga selesai adalah disunatkan.

Apakah Perkara-Perkara Yang Mengharuskan Untuk Memberhentikan Sembahyang?

Di antara perkara yang mengharuskan seseorang itu keluar daripada sembahyangnya, di antaranya ialah:

1. Apabila mendapati seseorang berada dalam bahaya atau kecelakaan. Umpamanya seorang buta yang hampir terjatuh ke dalam perigi, atau seseorang yang hampir diserang binatang buas dan tidak ada cara lain untuk menegur atau memberi peringatan kepadanya kecuali dengan memberhentikan sembahyangnya. Jadi dalam situasi atau keadaan ini adalah harus bahkan wajib ke atasnya menegurnya dengan percakapan sekalipun dengan berbuat demikian membatalkan sembahyangnya demi mengelakkan sebarang kecelakaan, kecederaan, kehilangan atau menyelamatkan nyawa dan harta benda.

2. Khusus bagi orang yang bersembahyang sunat sahaja, adalah harus dia keluar daripada sembahyangnya kerana menyahut panggilan ibu bapa. Bahkan menyahut panggilan ibu bapa itu adalah afdhal. Menurut Imam Ibnu Hajar *Rahimahullah*, menyahut panggilan ibu bapa ketika di dalam sembahyang sunat menjadi satu kewajipan bilamana ibu bapa boleh merasa dukacita sekiranya panggilan mereka itu tidak dijawab atau tidak diendahkan.
3. Untuk menyertai sembahyang berjema'ah bagi orang yang memulakan sembahyangnya secara bersendirian kerana semasa dia sembahyang bersendirian itu sembahyang jema'ah mula didirikan.

Syarat Memberhentikan Sembahyang Bersendirian Untuk Menyertai Sembahyang Berjema'ah

Hal memberhentikan sembahyang yang dilakukan secara bersendirian untuk menyertai sembahyang berjema'ah adalah diharuskan, tetapi hendaklah dengan mengambil kira beberapa perkara seperti berikut:

1. Sembahyang Fardhu;

Apabila seseorang sudah memulakan sembahyang fardhu secara bersendirian, kemudian ketika mengerjakan sembahyang itu dia mendapati sembahyang fardhu yang sama dikerjakan secara berjema'ah, maka adalah harus dan afdhal dia memberhentikan sembahyangnya semata-mata untuk mengikuti jema'ah.

Begitu juga sunat menukar niat sembahyang fardhunya itu kepada sembahyang sunat dua rakaat walaupun dia berniat sembahyang untuk tiga atau empat rakaat.

Akan tetapi untuk menukar niat sembahyang fardhu kepada sembahyang sunat dua rakaat kerana menyertai sembahyang jema'ah ini hanya boleh dilakukan jika:

1. Waktu sembahyang masih lagi panjang, yang mana jika dia menukar niat sembahyangnya sebagai sembahyang sunat dua rakaat, dia yakin setelah menyempurnakan sembahyang sunat dua rakaat itu dia akan sempat melakukan sembahyang jema'ah yang disertainya itu di dalam waktunya.
2. Melakukan jenis sembahyang fardhu yang sama dengan sembahyang jema'ah yang ingin disertainya itu. Contohnya seseorang sedang bersembahyang Zohor secara bersendirian kemudian datang sekumpulan yang lain untuk mendirikan sembahyang Zohor juga secara berjema'ah.
3. Imam sembahyang jema'ah yang ingin disertainya itu harus dan tidak makruh untuk diikuti (dijadikan imam). Misalnya hendaklah imam tersebut bukan seorang yang fasiq.
4. Orang yang bersembahyang bersendirian itu belum mengerjakan rakaat ketiga bagi sembahyang fardhunya yang tiga rakaat atau rakaat keempat bagi sembahyang fardhunya yang empat rakaat. Jika rakaat ketiga atau keempat itu sudah dikerjakannya, maka hendaklah disempurnakan sembahyang fardhu berkenaan terlebih dahulu, kemudian bolehlah diulangi sembahyang fardhu itu lagi secara berjema'ah .

Namun jika waktu tidak mencukupi ataupun sembahyang fardhu yang dilakukan secara berjema'ah itu berbeza dengan sembahyang fardhu yang dilakukannya secara bersendirian maka haram dia menukar niat sembahyang fardhunya itu kepada sembahyang sunat dua rakaat. Seperti contoh seseorang yang bersembahyang Zohor secara qadha haram menukar niat sembahyang fardhunya itu kepada sembahyang sunat dua rakaat kerana sembahyang berjema'ah yang ingin disertainya itu adalah sembahyang Asar.

2. Sembahyang Sunat;

Seseorang yang sedang mengerjakan sembahyang sunat, kemudian dia mendapati sembahyang fardhu berjema'ah didirikan, maka dalam keadaan ini jika dia tidak merasa bimbang akan ketinggalan sembahyang jema'ah tersebut, sunat dia menyempurnakan sembahyang sunatnya itu. Tetapi jika dia merasakan bahawa dengan menyempurnakan sembahyang sunatnya itu akan menyebabkan ketinggalan jema'ah, maka sunat dia memberhentikan sembahyang sunatnya itu dan menyertai jema'ah kerana sembahyang berjema'ah itu adalah lebih afdhal.

Sunat Mengulang Sembahyang Berjema'ah Walaupun Sudah Sembahyang Bersendirian

Jika kita terlepas untuk melakukan sembahyang fardhu secara berjema'ah kerana telah mengerjakan sembahyang tersebut secara bersendirian maka adalah sunat mengulangi sembahyang fardhu itu lagi secara berjema'ah kerana hukum mengulang sembahyang itu adalah sunat. Perkara mengulang sembahyang ini ada disebutkan dalam sebuah hadis yang diriwayatkan oleh Jabir bin Yazid bin al-Aswad al-'Amiriy, dari bapanya, dia berkata:

:

:

:

:

.

()

Maksudnya: “*Aku telah hadir bersama Nabi Shallallahu ‘alaihi wasallam pada masa haji (Wida‘)nya, Maka aku sembahyang bersamanya sembahyang subuh di masjid al-Khaif,*

Dia (bapa Jabir) berkata: “Apabila dia (Rasulullah) telah selesai dari sembahyangnya dan beredar, dia melihat dua orang lelaki dalam kumpulan yang lain tidak mengerjakan sembahyang bersamanya.

Baginda bersabda: “Dan hadapkan (bawakan) kepadaku mereka berdua.” Lalu dihadapkan mereka itu dan mereka mula menggigil ketakutan.”

Baginda bersabda: “Apa yang menghalangi kamu berdua untuk bersembahyang bersama kami?”

Mereka berdua berkata: “Wahai Rasulullah sesungguhnya kami telah mengerjakan sembahyang kami di tempat (rumah) kami.”

Baginda bersabda: “Jangan kamu lakukan itu. Jika kamu berdua telah mengerjakan sembahyang di tempat kamu, kemudian kamu berdua datang ke masjid di mana sembahyang jema‘ah sedang dilakukan, maka sembahyanglah kamu berdua bersama mereka, sesungguhnya (sembahyang itu) bagi kamu berdua menjadi sembahyang sunat.”

(Hadis riwayat at-Tirmidzi dan Abu Dâud)

Sebagai kesimpulan, sembahyang fardhu yang dilakukan secara bersendirian harus dan afdhal diberhentikan untuk menyertai sembahyang berjema‘ah jika merasa bimbang akan ketinggalan sembahyang jema‘ah itu.

Namun jika tidak merasa bimbang akan ketinggalan sembahyang jema'ah maka sunat menukar niat sembahyang fardhunya kepada sembahyang sunat. Akan tetapi selepas mengerjakan sembahyang sunat itu dia hendaklah yakin akan sempat mengerjakan sembahyang berjema'ah itu di dalam waktunya.

Begitu juga jika berada dalam rakaat ketiga bagi sembahyang fardhunya yang tiga rakaat atau rakaat keempat bagi sembahyang fardhunya yang empat rakaat maka hendaklah dia menghabiskan sembahyang fardhunya itu terlebih dahulu dan sunat mengulang sembahyang fardhu itu lagi secara berjema'ah.

Dalam sembahyang sunat pula, jika tidak merasa bimbang akan ketinggalan sembahyang jema'ah tersebut, sunat dia menyempurnakan sembahyang sunatnya itu. Tetapi jika merasa bimbang dengan menyempurnakan sembahyang sunatnya itu akan menyebabkan ketinggalan jema'ah, maka sunat dia memberhentikan sembahyang sunatnya itu dan terus menyertai sembahyang jema'ah.

Maka dengan demikian fadhilat sembahyang berjema'ah itu masih dapat diraih walaupun sedang atau setelah sembahyang bersendirian tertakluk kepada keadaan-keadaan yang telah dijelaskan.